

**ՔԵՄԱԼԱԿԱՆՆԵՐԻ 1920—1921 թթ. ԱՐՇԱՎԱՆՔՆ ԱՆԴՐԿՈՎԱԿԱՍ ԵՎ
1921 թ. ՄԱՐՏԻ 16-Ի ՄՈՍԿՈՎՅԱՆ ՊԱՅՄԱՆԱԳԻՐԸ**

Ե. Ղ. ՍԱՐԳՍՅԱՆ

Քեմալականները, որոնք մեծ մասամբ նախկին իթթիհադականներ էին և «անկախության համար ազգային պատերազմում» զգալի օգնություն էին ցուցնում խորհրդային Ռուսաստանից, օգտվելով Անդրկովկասում ստեղծված իրադրությունից, շարունակեցին երիտթուրքերի համաթյուրքական, նվաճողական քաղաքականությունը:

Անդրկովկասի նկատմամբ թուրք ազգայնականների ծավալապաշտ-նվաճողական քաղաքականությունը դրսևորվեց տակավին 1919 թ. էրզրումի (հունիսի 28—օգոստոսի 6) և Սըվազի (սեպտեմբերի 4—12) համագումարներում: Դրանց որոշումներում 1918 թ. թուրքական զորքերի կողմից բռնախլոված հայկական և վրացական հողատարածքները, որոնք Մուդրոսի պայմանագրով մաքրվել էին թուրքական զորքերից, դիտվում էին Թուրքիայի հողատարածք: Ավելին, այդ համագումարներում որոշվեց ոչ միայն ցեղասպանությանը մեկուկես միլիոն զոհ տված հայությանը վերջնականապես զրկել Արևմտյան Հայաստանի նկատմամբ ամեն մի իրավունքից, այլև վճռական պայքար մղել Անդրկովկասում անկախ Հայաստանի ստեղծմանը նպատակամղված ամեն մի շարժման դեմ:

Այս որոշումները հիմք դարձան Ստամբուլում 1920 թ. հունվարին համաթյուրքական խորհրդարանում հռչակված «Ազգային ուխտի», որը նախատեսում էր Բաթումի մարզի, Կարսի, Արդահանի և Հայաստանի ու Վրաստանի մի քանի այլ շրջանների ընդգրկումը թուրքական նոր պետականության կազմում:

1920 թ. փետրվարի 6-ին Մ. Քեմալի գլխավորած ներկայացուցչական կոմիտեի նիստում ընդունվեց հետևյալ որոշումը. «Արևելյան ճակատում պաշտոնական կամ կիսապաշտոնական զորաշարժ անցկացնել և սկսել զորքերի կենտրոնացումը՝ կովկասյան արգելապատնեշները թիկունքից լուծարել ենթարկելու համար»¹: Մ. Քեմալն այս որոշման մասին տեղյակ պահեց Արևելյան ռազմաճակատի հրամանատար Կարաբեքիրին, որ արդեն գարնանը նա ավարտել էր զինյալ ուժերի համալրումն ու վերազինումը՝ Հայաստանի վրա հարձակվելու համար: Ապրիլի կեսերին Կարաբեքիրը հեռադրեց Անկարայի ղեկավար շրջաններին. «Մոտ օրերս ես պետք է հաղորդեմ այն մասին, որ Հայաստանը ջնջված է աշխարհի քարտեզից»²:

Սակայն Անկարայի կառավարությունը տվյալ պահին տակավին հույս ուներ զործարքի մեջ մտնել Անտանտի երկրների հետ և այս պատճառով էլ միառժամանակ հետաձգեց Հայաստանի վրա հարձակումը:

Անդրկովկասի նկատմամբ թուրք ազգայնականների նվաճողական-ծավալապաշտ քաղաքականությունը երևում էր նաև Քեմալի կողմից 1920 թ. ապրիլի 26-ին խորհրդային կառավարությանն ուղարկված նամակից, որում խնդրվում էր դիվանագիտական հարաբերություններ հաստատել և Թուրքիային նյութապես և ռազմամթերքով օգնել: Մ. Քեմալի նամակի երկրորդ կետն այսպիսին էր. «Եթե խորհրդային ուժերը ծրագրում են ռազմական գործողու-

¹ Мустафа Кемаль, Путь новой Турции, т. 3, М., 1934, с. 313.

² C. al Kutay, Karabekir Erministanı nasıl yor etti, İstanbul, 1956, s. 36.

³ A. al Kutay, Milli mücadele za İtalya, İstanbul, 1953, s. 482.

թյուններ սկսել Վրաստանի դեմ, կամ դիվանագիտական ճանապարհով իրենց ազդեցության միջոցով, Վրաստանին հարկադրել միության մեջ մտնելու և ձեռնարկելու Կովկասի տարածքից անգլիացիների վտարումը, ապա թուրքական կառավարությունն իր վրա է վերցնում կայսերապաշտ (իմպերիալիստական) Հայաստանի դեմ ռազմական գործողությունները և հանձն է առնում հարկադրել Ադրբեյջանի հանրապետությանը՝ մտնելու խորհրդային պետության կազմի մեջ⁴:

Խորհրդային Ռուսաստանի կառավարությունը հասկանալով Մ. Քեմալի առաջարկի հետին միտքը, հունիսի 3-ի իր պատասխանում բավականին որոշակի նշեց, որ համաձայն է Թուրքիայի հետ դիվանագիտական հարաբերություններ հաստատել և պատրաստ է Անտանտի ռազմական միջամտության դեմ պայքարում օժանդակություն ցույց տալ, պայմանով, որ Անկարայի կառավարությունը բարիդրացիական հարաբերություններ պահպանի Անդրկովկասի հանրապետությունների հետ և արդարացի լուծի հողատարածքային վեճերը, ընդ որում, տվյալ հարցում առաջարկվում էր Մոսկվայի միջնորդությունը⁵: Հունիսի 20-ին իր պատասխանում Մ. Քեմալն ընդգծում էր, որ իր «կառավարությունն ընդունում է Ռուսաստանի Խորհրդային Հանրապետության միջնորդությունը և հետաձգում իր ռազմական գործողությունները Կարսի, Արդահանի և Բաթումի շրջաններում»⁶:

Այն, որ Խորհրդային Ռուսաստանի կառավարությունը, ելնելով առաջին հերթին իր իսկ սեփական ռազմաքաղաքական շահերից, դեմ էր թուրք ազգայնականներին՝ Անդրկովկասում նախահարձակողական ծրագրերին, երևում է նաև Համամիութենական Կենտգործկոմի հունիսի 17-ի նիստում արտաքին գործերի ժողովում Գ. Չիչերինի տված զեկուցումից: Խոսելով քեմալական Թուրքիայի հետ բարեկամական հարաբերությունների հաստատման մասին, նա ընդգծում էր. «Մենք Թուրքիայի հետ բարեկամական հարաբերությունների մեջ մտնում ենք այն պայմանով, որ Թուրքիայի և հարևան ժողովուրդների միջև, ինչպիսին հայ ժողովուրդն է, հաստատվի փոխադարձ սահմանազատում և դադարեցվեն փոխադարձ կոտորածները»⁷:

Ընդունելով Խորհրդային Ռուսաստանի միջնորդության առաջարկը, Անկարայի կառավարությունը համաձայնվեց Մոսկվա ուղարկել հատուկ պատվիրակություն, ջանալով ցույց տալ, թե իբր կողմնակից է տարածքային վեճի հարցերը խաղաղ ճանապարհով լուծելուն: Իրականում քեմալականները երբեք չհրաժարվեցին իրենց նախահարձակողական-նվաճողական մտադրություններից և պարզապես պատեհ առիթի էին սպասում՝ հայաստանությունն ավարտին հասցնելու իրենց ծրագրերն իրականացնելու համար:

Թուրքիայի արտաքին գործերի նախարար Բեքիր Սամի բեյի գլխավորած պատվիրակությունը հունիսի 19-ին ժամանեց Մոսկվա և մի շարք հանդիպումներ ունեցավ Գ. Չիչերինի ու նրա տեղակալ Լ. Կարախանի հետ, ապա ընդունվեց Լենինի կողմից: Խորհրդային Ռուսաստանի կառավարությունը մոսկովյան բանակցություններում առաջ քաշեց ազգագրական սահմանների սկզբունքը, որը հիմնվում էր մինչև համաշխարհային պատերազմը դրություն ունեցած ազգամիջյան փոխհարաբերությունների իրադրությունների վրա: Ելնելով դրանից, Խորհրդային կառավարությունն առաջարկեց կազմակերպել (ազգաբնակչության) փոխադարձ վերաբնակեցում այնպես, որ սահմանի երկու կողմերում ստեղծվի միատարր ազգագրական հողատարածք: Վարձ ասած, Խորհրդային կառավարությունն առաջ քաշեց «թուրքական հին սահմանի այնպիսի ճշգրտում, որի շնորհիվ մի կողմից վերակշռաբար մահմեդական, ազգաբնակչությամբ հողատարածքներն անցնեն թուրքերին, իսկ

⁴ АВП СССР ф. 132—референтура по Турции, п. 3, оп. 2, д. I, лл. II.

⁵ Документы внешней политики СССР (далее ДВП СССР), т. 2, М., 1958. с. 555.

⁶ „Die Welt Islam“, vol. XVI, Berlin, 1934. s. 27—28.

⁷ АВП СССР, т. 2, с. 658.

մյուս կողմից Հայաստանին անցնեին այն հողատարածքները, որտեղ մինչև 1914 թ. հայկական մեծամասնություն էր առկա»⁸:

Ինքիր Սամիի պատվիրակությունը սեղանին դրեց բոլորովին այլ պահանջներ, նա ոչ միայն շցանկացավ լսել այն մասին, որ արևմտահայ նահանգներից թեկուզ մեկը հարկ է գիշել, այլև պնդեց հաստատել Բրեստ-Լիտովսկի թալանչիական պայմանագրի հիմամբ ճշտորոշված Թուրքիայի հյուսիս-արևմտյան սահմանները: Ուրիշ խոսքով, Հայաստանի հանրապետությունը պետք է հարկադրվեր թուրքերին վերադարձնել Կարսի մարզը: Դրա համար էլ զարմանալի չէ, որ բանակցությունները 1920 թ. ամռանը ձախողվեցին: Ժամանակակից թուրք պատմաբանները փորձում են մեղքը բարդել Մոսկվայի վրա, թե իբր Մոսկվան «պահանջել է թուրքական հողատարածքները գիշել Հայաստանին»⁹: Ոմանք նույնիսկ մատնանշում են որոշակի «մեղավորին»¹⁰: Կ. Չիչերինին: Թեֆիք Բյուքուզլուն, օրինակ, գրում է. «1920 թ. ագոստոսի 28-ի զրույցի ժամանակ Չիչերինը վերստին պնդեց Վանի և Բիթլիսի վիլայեթների որոշ մասեր Թուրքիայից անջատելու վրա»: Նույն հեղինակն այնուհետև նշում է, որ «Բարեկամական պայմանագրի» ստորագրումը «ձգձգվեց այն պատճառով, որ Չիչերինը Թուրքիային ընձեռվելիք օժանդակությունը պայմանավորեց Վանի, Բիթլիսի և Մուշի շրջանները հայերին գիշելով»¹⁰:

Թուրք ազգայնական ղեկավարները, հակառակ իրենց հռչակած սկզբունքների, ամբողջ Հայաստանի նկատմամբ իրենց ստոր ախորժակով հրահրված՝ մերժեցին արդարացի առաջարկություններն ու դրանով իսկ 1920 թ. մոսկովյան բանակցությունները ձախողման դատապարտեցին:

Մոսկվայում 1920 թ. հունիս-հուլիսին տեղի ունեցան խորհրդա-հայկական բանակցություններ: Հայկական Հանրապետության պատվիրակության ղեկավարն էր Լևոն Շանթը: Այդ բանակցությունների նախաձեռնողը Խորհրդային Ռուսաստանի կառավարությունն էր, որը երկու կողմերի համաձայնությամբ Հայաստանի և Թուրքիայի միջև միջնորդի դեր էր խաղում, ձգտելով վերջ տալ հայ-թուրքական ընդհարումներին և երկու երկրների միջև գոյություն ունեցող սահմանային վեճերին:

Սակայն Խորհրդային Ռուսաստանի ջանքերը ազգայնական Թուրքիայի զավթողական քաղաքականության հետևանքով հաջողությամբ չպսակվեցին: Ինչի մասին բեյը, որը լսել չէր ուղում Հայաստանի Հանրապետությանը Արևմտյան Հայաստանի որևէ վիլայեթ «գիշելու» մասին, ընդգծեց, որ երկու կառավարությունների միջև որպես հարաբերությունների հիմք ծառայում են Բրեստ-Լիտովսկի պայմանագիրը և դրան լրացնող Բաթումի պայմանագիրը: Նրա բերած փաստարկներն անհիմն էին թեկուզ այն պատճառով, որ նշված պայմանագրերը կնքված էին սուլթանական կառավարության կողմից, որին քեմալական կառավարությունը չի ճանաչել:

Հայաստանի հանրապետության պատվիրակությունն իր հերթին չբավարարվելով Վանի, Մուշի, Բիթլիսի վիլայեթներով, ինչպես այդ առաջարկում էր խորհրդային կառավարությունը, պահանջում էր նաև Թուրքահայաստանի մյուս վիլայեթները:

Լևոն Շանթի գլխավորած պատվիրակության անդամ Հ. Տերտերյանը իր հուշերում գրել է, որ Լ. Կարախանը նրան ցույց տալով Հայաստանի հանրապետության քարտեզը, ասել է. «Դուք դաշնակցական եք, իսկ ես՝ կոմունիստ, քայց մենք երկուսս էլ հայ ենք. մեզ համար թանկ են հայ ժողովրդի շահերը, այժմ համաձայնվենք ձեր հանրապետությանը միացնելու այդ երեք վիլա-

⁸ Նույն տեղում, էջ 726—727:

⁹ Ali Fuat Cebesiz, Moskova Hatıraları, İstanbul 1975, s. 35—37.

¹⁰ Türk Dışişleri Bakanlığı, Atatürk Anadolu'da, Ankara, 1959, İstanbul, 1969, s. 20—21.

յնքները, հետո կտեսնենք»¹¹, Հայաստանի պատվիրակությունը չընդունեց այդ առաջարկը և բանակցությունները ձախողվեցին:

Բանակցությունների օրերին խորհրդային կողմն այնքան վստահությամբ էր վերաբերվում թուրքական պատվիրակությանը, որ նրա ղեկավար Բեքիր Սամի բեյը Թուրքիա մեկնելու պատրվակով եղավ Ադրբեյջանում, Ինդուշեթիայում և Դաղստանում, ուր զբաղված էր հակախորհրդային պրոպագանդայով: Նրան օժանդակում էին մուսավաթականները:

Թուրքական պատվիրակության անդամներից Ալի Ֆուադ Զեբեսոյը փորձում է սքոդել Անկարայի կառավարության նախահարձակողական մտադրությունները և բանն այնպես ներկայացնել, որ իբր իրենց պահանջները բացարձակապես օրինական էին, քանի որ իբր թե վերաբերում էին պատմականորեն թուրքական տարածքներին: Նա գրել է. «Անկարայի կառավարությունը հարևան երկրների նկատմամբ որևէ թշնամական մտադրություն չունեն և ազգային սահմանների շրջանակներում սեփական անկախության և ազատության նվաճումից բացի ուրիշ նպատակ չէր հետապնդում»¹²:

Փաստերն աղավաղելով, թուրք հեղինակները խորհրդային Ռուսաստանի կառավարությանը համարում են մոսկովյան բանակցությունների ձախողման պատճառաբանություն: Բյուրջլյուն, օրինակ, սոսի է.

«1920 թվականի օգոստոսի 24-ին Մոսկվայում բարեկամության նախական պայմանագիրը չկնքելու հիմնական պատճառն այն եղավ, որ խորհրդրդային կողմը մտադրվել էր մեր արևելյան նահանգների հողերը տալ հայ դաշնակներին»¹³, Այնուհետև փաստերը խեղաթյուրելով, նա փորձում է արդարացնել Հայաստանի դեմ քեմալական նախահարձակումը, այն ներկայացնելով որպես «խաղաղասիրական քայլ»: Նա գրում է. «Դաշնակցական Հայաստանի դեմ 1920 թ. սեպտեմբեր-հոկտեմբերին ձեռնարկված ոչ երկարատև պատերազմական գործողությունների նպատակն էր այդ շրջանում խաղաղությունն ու անդորրը հաստատել և կենսագործել մեր ազգային ուխտը»¹⁴:

Ի դեպ, Մուսաֆա Քեմալն ինքը բազմիցս հաստատել է Հայաստանի վրա նախահարձակման նախապատրաստությունների իրողությունը: Այլապես, օրինակ, 1920 թ. օգոստոսի 14-ի իր հռոտում նա քննադատել է. «Առաջին Մեծ ժողովի նախարարների խորհրդին լիազորել է զրավել երեք նահանգները (խոսքը Կարսի, Արդահանի և Բաթումի մասին է—ն. Ղ.), հենց որ հնարավորություն ստեղծվի: Այդ իսկ պատճառով հունիսի 6-ին մենք արևելյան դորաբանակին հրամայեցինք գրոհի նախապատրաստվել»¹⁵: Մակայն, փաստերից բխում է անհերքելի այն իրողությունը, որ քեմալական կառավարությունը կանխօրոք նախապատրաստել և հանգամանորեն մշակել էր Հայաստանի, որպես պետության, ոչնչացման ծրագիրը և սեփական նախաձեռնությամբ էլ սկսել դրա իրականացումը:

Հարկ է նշել, որ ժամանակակից թուրք հեղինակները փորձելով 1920 թ. աշնանը Հայաստանի դեմ Թուրքիայի նախահարձակումը ներկայացնել որպես ժազատագրական պայքարի կարևոր նախադրյալ, բացեիքաց գրում են քեմալականների կողմից այդ պատերազմի նախապատրաստման, ռազմական ուժերի համակենտրոնացման և հարակից հարցերի մասին: Այս տեսակետից հետաքրքրական է Ալի Ֆուադ Զեբեսոյի խոստովանությունը:

Իր հուշերում Զեբեսոյը, Հայաստանի վրա արշավելուց առաջ արևելյան ռազմաճակատում ձեռք բերված նախապատրաստական միջոցառումներին անդրադառնալով գրում է. «Ծթե Քյազիմ Կարաբեքիր փաշայի՝ Հայաստանի

11 Տե՛ս Ս. Կարապետյան, 1920 թ. Հայ-թուրքական պատերազմը և Սովետական Ռուսաստանը, Երևան, 1965, էջ 11:

12 Ali Fuat Cebesoy, Meskova Hatıraları, s. 90—91.

13 „Belleten“, Temmuz, 1961, s. 479.

14 Նույն տեղում:

15 Atatürk'ün söyle ve demeileri, cilt I, İstanbul, 1945, s. 93.

վրա շարժվելու առաջարկությունը մայիս ամսին առարկության շահնդիպեր, ապա 1920 թվականի աշնանը, Արևմուտքում տեղի ունեցած կարևոր փոփոխությունների ժամանակաշրջանում (հուլիսի դեմ) արևմտյան ռազմա-ճակատը կրկնակի ուժեղ կլինե՞ր¹⁶։ Հեղինակի կարծիքով հենց մայիսին էր առկա «առավել բարենպաստ» այն իրադրությունը, որն անհրաժեշտ էր թուրքական պրոհն սկսելու համար. «1920 թ. մայիսին,—դրո՞ւմ է նա,—հայկական բանակը զբաղված էր բուլղարիկյան ներքին խռովությունը ճնշելու և հյուսիսում աղբյուրներին կասեցնելու գործով։ Մենչևիկյան վրաստանն ի վիճակի չէր օգնելու Հայաստանին։ Եվ ահա այդպիսի կացության մեջ գտնվող հայերի դեմ կանգնած էին երեք կանոնավոր զորաբանակներ և 15-րդ զորաբանակի կամավորական զնդերը։ Այդ զորքն ի վիճակի էր հայերին արագորեն պարտության մատնել»¹⁷։

Սոսկության բանակցությունների ձախողումից հետո Անկարայի կառավարողները, օգտվելով այն հանգամանքից, որ Խորհրդային Ռուսաստանը հարկադրվել էր լեհական ներխուժման դեմ պայքարելու նպատակով որոշ զորամասեր կոպկասից հետ կանչել, ձեռնարկեցին Անդրկովկասի նկատմամբ իրենց հարձակողական ծրագրերի կենսագործումը։

Սեպտեմբերի 8-ին Մ. Քեմալի նախագահությանը կայացավ ռազմական գերագույն խորհրդի նիստ, որտեղ լսվեց Կարաբեքիրի հաղորդումը՝ արևելյան ռազմաճակատում թուրքական զորքերի նախապատրաստությունների վերաբերյալ։ Զեկուցողը ժողովականներին վստահեցրեց, որ իր հրամանատարության ներքո գտնվող 4 զորաբանակները և մի քանի հազար բաշիբոզուկները լիովին բավարար են՝ իր առաքելությունը գլուխ բերելու համար։

Տակավին 1919 թ. ամռանը Քյադիմ Կարաբեքիրի պատվիրակները մըշտական կապ էին պահպանում Բաքվի մուսավաթական կառավարության հետ։ 1919 թ. վերջերին Բաքու ժամանեց թուրքական զորամիավորումներից մեկը։ Նախկին հրամանատար Խալիլ փաշան։ Մ. Քեմալի կողմից նրան առաջադրանք էր տրվում ապահովել խորհրդային իշխանության ռազմական, նյութական և բարոյական աջակցություն իր շարժմանը։ Այդ ժամանակ Աղբեջանում աղատ գործողության իրավունքից օգտվում էր Նուրի փաշան, որը ղեկավարում էր մուսավաթականների հետ սերտորեն շաղկապված և համաթյուրքական քարոզչություն ծավալած «Թուրքական ժողովրդային պատվերակություն» կոմիտեն։ Բաքվում էր գտնվում նաև մուսուլմանական Թուրք Սաբիտ օղլուն՝ էրզրումի համագումարի կազմակերպիչներից մեկը։ 1920 թ. նա իրեն հայտարարեց Բաքվում թուրքական գլխավոր ներկայացուցիչ։ Այդ տարվա առաջին ամիսներին թուրքական զործակալներն արդեն ամրապնդել էին Անատոլիայի ու Բաքվի կապը և թուրք ազգայնականների կողմից Հայաստանի բռնագրավումը համարում էին մոտավորապես «հրաշալի գործ»։

Թուրքերն իրենց ցեղասպանական-նվաճողական գործողություններն իրականացնում էին Անտանտի դեմ պայքարի կարգախոսով, իսկ բուն Հայաստանի դեմ պատերազմը հռչակում էին որպես «Անտանտի դաշնակից հայկական իմպերիալիզմի դեմ պայքար»։ Քեմալական հրամանատարությունը հայտարարեց, որ իր զորքերը մարտնչում են «Անտանտի գործակալ դաշնակներին» դեմ, հանուն «դաշնակների լծից հայ ժողովրդի ազատության»։ Ամենուրեք և ոչ առանց հաջողության տարածվում էին լուրեր այն մասին, որ քեմալականները իբր ճիշտ ու ճիշտ այնպիսի հեղափոխականներ են, ինչպիսիք բուլղարիկներն են։

Խորհրդային Ռուսաստանի պաշտոնական շրջանները փառաբանում էին քեմալական շարժումը, չտեսնելու տալով նրա հակախորհրդայնությունն ու ծավալապաշտ նկրտումները։ Քեմալական Թուրքիան դիտվում էր որպես

¹⁶ A'l Funt Ceheroy, M. H. H. mündele hatiraları, s. 474.

¹⁷ Նույն աղբյուր։

Արևելքում սոցիալիստական հեղափոխության դրոշակակիր: Բուլշևիկյան կուսակցության ղեկավարության համար փոքր ժողովուրդների հարց դուրս էր լուծվում: Ահա թե ինչ է գրել «Բզմաստի» թերթը 1920 թ. նոյեմբերի 22-ին. «Անդրկովկասի կոմունիստական կուսակցությունը, որի համար գոյություն չունի շունչ ազգային հարցեր, որպես այդպիսի, պետք է իրադարձությունները գնահատի համաշխարհային հեղափոխության հիմքերի ամրապնդման տեսակետից: Ինչպես Հայաստանի դաշնակցականները, այնպես էլ վրաստանի մենշևիկները սեղ համար այս խոշորագույն քարակույտն են, որից հարկ է մաքրել հեղափոխության դեպի Արևելքի ճանապարհը: Կուսակցության բոլոր ուժերը ներդրված են այդ խոշորագույն վերացնելու դործին: Այդ նույն պատասխան է հետապնդում նաև Խորհրդային կենտրոնական իշխանությունը: Ինչպես դեպքերում միասնությունը հրապարակեցին քեմալականների «հեղափոխականություն» խայծով և ընկան թուրքերի թակարդը: Քեմալականների քարոզչության հաջողությանը քիչ չնպաստեցին Հայաստանի հեղինակավոր կողմից դեպի արևելք հայ բուլշևիկները, որոնք դաշնակցականների հեղինակությունն ամեն դեպքում իրենց ջանքերում մինչև կոկորդիսները խրվեցին ազգավնաս դիրքորոշման մեջ: Այսպես, Հայաստանի հեղինակ հույժ գաղտնի փաստաթուղթը՝ ուղղած հւլ կոմունիստներին և հատկապես Հայաստանի հանրապետության՝ քեմալական զավթիչների դեմ պայքարող թուրքերին, պնդում էր. «1. Ներկա թուրքերն այլևս նախկին սուլթանական թուրքերն չէ և Հայաստանի հանդեպ ագրեսիվ նպատակներ չունի:

2. Քեմալական թուրքերն Խորհրդային Ռուսաստանի հետ դաշնակից է և պայքարում է իր ազատության համար ընդդեմ իմպերիալիստական պետությունների՝ Անգլիայի, Ֆրանսիայի և Հունաստանի:

3. Հանրապետական Հայաստանի հաղթանակը թուրքերի վրա այդ կնշանակի իմպերիալիզմի ուժեղացումը Մերձավոր արևելքում և սրանով իսկ կվտանգվի հեղափոխության հաղթանակը Անդրկովկասում, իսկ ընդհանրապես, Հանրապետական Հայաստանի պարտությամբ կարագացվի ողջ Անդրկովկասի, ապա նաև Արևելքի խորհրդայնացումը:

4. Հայ բուլշևիկ-կոմունիստների խնդիրը պետք է լինի՝ արագացնել հանրապետական Հայաստանի պարտությունը, որով և կարագացվի Հայաստանի խորհրդայնացումը:

Այս նպատակի համար պետք է. 1. Կազմալուծել հայկական կոմունիստական բոլոր միջոցներով, այն է՝ ա) կազմակերպել դասալքություն և ամեն կերպ խանգարել զորահավաքին, բ) ռազմաճակատներում հասկացնել զինվորներին, որպեսզի նրանք չկրակեն առաջացող թուրքական զինվորների վրա, այլ, լքելով դիրքերը վերադառնան թիկունք, գ) չենթարկվել սպանների հրամաններին և հարկ եղած դեպքում ոչնչացնել նրանց:

2. Այս ամենի հետ ամենաէականն է հասկացնել հանրապետական Հայաստանի զինվորներին, որ հաղթող թուրքական ասկյարները հեղափոխական ասկյար են, որոնք ոչ միայն իրենց թույլ չեն տա որևէ բռնի գործողություն պարտված երկրի վերաբերյալ, չեն վնասի խաղաղ ազգաբնակչությանը, այլև կօժանդակեն աշխատավոր հայ ժողովուրդին ազատելու իմպերիալիստների գործակալ դաշնակցականների տիրապետությունից:

3. Նորից ու նորից բացատրել, որ դաշնակցականների տիրապետությունից օգտվելով, Հայաստանն անմիջապես կկապվի Խորհրդային Ռուսաստանի հետ, ընդմիջտ վերջ կտրվի պատերազմին, և սովից ու մշտական ընդհարումներից քայքայված երկիրը կլիանա Ռուսաստանի հացով և մասնակից կդառնա համաշխարհային հեղափոխության մեծ գործին»¹⁸:

Այս ազգադավ փաստաթուղթը ստորագրել են Սարգիս Կասյանը, Ասքանազ Մուսվաթյանը, Ավիս Նուրիջանյանը, Շավարշ Ամիրխանյանը, Իսահակ Դովլաթյանը և Աշոտ Հովհաննիսյանը:

Նրբ Բաքվում 1920 թ. սեպտեմբերին ընթանում էր Արևելքի ժողովուրդների 1-ին համագումարը, տեղի ունեցավ այդ կազմակերպության նախագահության նիստը, որն ընդունեց «Եզրակացություն» կոչվող հույժ գաղտնի փաստաթուղթ: Այն սկզբից մինչև վերջ հազեցված է հակահայկական ոգով: Հայաստանի Հանրապետությունն այնտեղ ներկայացված է որպես ագրեսիվ ուժերի կենտրոն, հարևան երկրների համար մշտական վտանգի աղբյուր: Այդ փաստաթղթում հայ ժողովրդի շահերն ըստ էության, զոհաբերում էին «համաշխարհային հեղափոխության հաղթանակին»¹⁹:

Քեմալական զավթիչների օգտին էին գործում հատկապես լենինը, Ստալինը և Տրոցկին: Միայն վերջերս մատչելի դարձած արխիվային փաստաթղթերը վկայում են ու հաստատում, թե Ստալինն ինչ չարագուշակ դեր է խաղացել Հայկական հարցում, ինչպիսի աղետալի հետևանքներ են ունեցել նրա ապակողմնորոշող հեռագրերն ու նամակները 1920 թ. նոյեմբերի 5-ին օրինակ, երբ թուրքերն արդեն տիրել էին Սարիղամիշին ու Կարսին և ընդհուպ մոտեցել Ալեքսանդրապոլին, նա Բաքվից հեռագրել է լենինին. «Ձեզ կողմնորոշելու համար հաղորդում եմ... դրությունը թուրքիայում պարզ չէ. այն կարող է վտանգավոր դառնալ, եթե տեղի ունենա Քեմալի համաձայնությունը Անտանտի հետ, քանի որ Քեմալի շեղբացումը կդյուրացնի դեպի Բաքու Անտանտի ղեկավարումը: Հետևաբար, առանց մանրակրկիտ հետազոտության և թուրքիայում իրադարձության պարզաբանման, պետք չէ Հայաստանի հետ կնքել պայմանագիր, որը Հայաստանին, նշանակում է՝ Անտանտին կհանձնի մոսկովյան ազգաբնակչությանը ստրատեգիական կարևորագույն մի շրջան և որը մեզ կներքաշի թուրքիայի հետ առհակատման մեջ: Անհրաժեշտ է առայժմ ձգձգել Հայաստանի հետ պայմանագրի կնքումը, ձեվացնելով, որ Հայաստանի համար ձեռնտու խաղաղություն ենք ցանկանում, իսկ հետագային ամեն ինչ պարզ կլինի»²⁰:

Թուրքական զորքերը միմյանց հետևից գրավեցին Կարսի մարզը, Ալեքսանդրապոլը, Սուրմալուի գավառը և երկաթուղու Ալեքսանդրապոլ-Ղարաբաղի խառն հատվածը, կտրելով Հայաստանն արտաքին աշխարհի հետ կապող միակ ճանապարհը: Նոյեմբերի 7-ին Ստալինը Բաքվից հեռագրում է լենինին և Զիչերին. «Կարսը, իրոք, գրավված է, Ալեքսանդրապոլը հավանական է կգրավվի, ըստ որում թուրքերն իբր ավելի հեռու չեն գնալու այն գծից, որը հայտնի է Մոսկվային: Կարծում եմ, որ այս տեղեկություններն ուշացած են, քանի որ թուրքերն արդեն գիծն անցել են և բացի այդ ցանկանում ու հետապնդում են իրենց սեփական նպատակները, ուրիշ խոսքով՝ ըստ երևույթին ցանկանում են Հայաստանին հարկադրել հրաժարվելու Սևրի պայմանագրից և Անտանտին էլ կատարված իրողության առաջ դնել քեմալականների՝ Կոստանդնուպոլսում նախատեսվող բանակցությունների կապակցությամբ»²¹:

Դեռ մինչև թուրքական զորքերի Հայաստան ներխուժումը Անկարայի և Խորհրդային Ռուսաստանի կառավարությունները սյուլմանավորված են եղել այն բանի շուրջ, որ հարձակման անցնելու դեպքում թուրքերը Սարիղամիշի գծից այս կողմ չանցնեն: Այդ են վկայում թուրքիայի արտաքին գործերի նախարարության քաղաքական բաժնի պետ Հիքմեթի հաղորդագրությունները մեկի հետևյալ տողերը. «Իրադրությունների ճնշման ներքո հարկադրվեցինք հարձակողականի անցնել Հայաստանի դեմ, հնարավորություն չունենալով մեր առաջխաղացքը քննարկել Խորհրդային Ռուսաստանի հետ: Համաձայն Խորհրդային Ռուսաստանի հետ մեր համատեղ որոշման, հարձակման դեպքում մենք Սարիղամիշից այն կողմ պետք չէ անցնենք»²²:

¹⁹ Հայաստանի Հանրապետության կենտրոնական պատմական արխիվ (այնուհետև՝ ՀՀ ԿՊԱ), ֆ. 113, ց. 5, գ. 7, թ. 1—3:

²⁰ ИМЛ ЦПА ф. 558, оп. I, д. 1987, л. 1.

²¹ Նույն տեղում, ֆ. 558, ց. 1, 1989, թ. 1:

²² ՀՀ ԿՊԱ, ֆ. 114, ց. 2, գ. 25, թ. 94:

Անկարայի և Մոսկվայի միջև նման պայմանավորվածության գոյությունը հաստատել է նաև Ստալինը՝ Կովկասյան բյուրոյի 1920 թ. նոյեմբերի 4-ի նիստում: Նա ասել է. «Քեմալի համար հարցը դրված է այնպես, որ նա պիտի հարձակվի մինչև Սարիղամիշ: Մոսկվայից Քեմալին հեռագիր է ուղարկված, սակայն հայտնի չէ, թե նա ստացել է, թե ոչ»²³: Այն, որ այդպիսի պայմանավորվածություն, իրոք, եղել է, հաստատվում է նաև թուրք զավթիչների դեմ ռազմական օժանդակություն ընձեռելու Հայկական կառավարության խնդրանքին Լենինի պատասխանով. «Ռուսաստանը պատրաստ է կարգն ու անվտանգությունը պահպանելու համար զորք ուղարկել: Հենց այստեղ էլ, Հայաստանի հասցեին ամենայն համակրանք հայտնելով Լենինը չզայցավ արսի վերաբերմամբ հայ ժողովրդին խորհուրդ տալ՝ «Մոռանալու իր հավակնությունները, քանի որ Կարսի սարը բռնե՛լ հայկական չի եղել»²⁴: Խորհրդային Ռուսաստանի ղեկավարների մեջ կային նաև ազնիվ, տեղի ունեցող երևույթներն ու դեպքերը օբյեկտիվորեն գնահատող համաշխարհային հեղափոխության ցնորքից հետո կանոնադրաբար: Այդպիսիներից էին Ռուսաստանի արտաքին գործերի ժողկոմ Գ. Ջիչերինը, նրա տեղակալ Լ. Կարախանը և Հայաստանում Ռուսաստանի լիազոր ներկայացուցիչ Բ. Լեդրանը: Նրանք ամեն կերպ ձգտում էին ցույց տալ, որ քեմալականները Հայաստանի և Վրաստանի նկատմամբ շարունակում են երիտթուրքերի զավթողական, ջարհարարական, պաշտոնական քաղաքականությունը: Այդ մասին ժամանակին Բ. Լեդրանն ասել է. «Քանի դեռ թուրքերը կշարունակեն իրենց քաղաքականությունը Հայաստանի նկատմամբ, պետք չէ նրանց ընդհանրապես հավատալ»: Լեդրանն այնուհետև նշել է. «Թուրքերի նվաճողական-ազգայնամոլական նկրտումների առկայությունը Կարս-Ալեքսանդրապոլի իսկ դուցե և Աշարիա-Բաթումի նկատմամբ, առավել կամ նվազ անկասկածելի է»²⁵:

Դեպի Հայաստան իրենց զինարշավով քեմալականները նաև նպատակ էին հետապնդում Հայաստանին ջախջախելուց հետո ռազմական միակողմանի ակտով պատռել Սևրի պայմանագիրը և դրանով իսկ ներգործել Թուրքիայի նկատմամբ Անտանտի երկրների քաղաքականության վրա: Անգլիական «Թայմզ» թերթը 1920 թ. դեկտեմբերի 23-ին այս կապակցությամբ գրում էր. «Մուսթաֆա Քեմալը Հայաստան ներխուժեց Կարսն ու Արդահանը բռնադրավելու համար: Նրան թվաց, որ Հայաստանն իր ձեռքում պահելով, կկարողանա ճնշում բանեցնել Թուրքիայի նկատմամբ Անտանտի և ԱՄՆ-ի քաղաքականության վրա»:

Մինչ թուրքական զորքերը շարունակում էին իրենց ավերիչ արշավը դեպի Հայաստանի խորքը, Հայաստանի Հանրապետության կառավարողները հույսները դրել էին Անտանտի օգնության վրա: Տակավին սեպտեմբերի 30-ին Վրաստանում Հայաստանի Հանրապետության լիազորը դիմում էր դաշնակից երկրների ներկայացուցիչներին՝ խնդրելով ռազմական և նյութական օժանդակություն ընձեռել: Նույնատիպ խնդրանքը կրկնվում է նաև հոկտեմբերի 1-ին, 8-ին, 14-ին, 17-ին և 27-ին: Սակայն դաշնակից տերություններն ամեն անգամ պատասխանում էին, որ տվյալ պահին իրենք ի վիճակի չեն շոշափելի օգնություն հասցնել և որ հայերը պետք է հույսներն իրենց սեփական ուժերի վրա դնեն ու գործեն ինքնուրույն: Թիֆլիսում Մեծ Բրիտանիայի ներկայացուցիչ գնդապետ Ստրասն Ա. Խատիսյանին ասում է. «Անգլիան ներկայումս անզոր է Հայաստանին իսկական օգնություն ցույց տալու»²⁶, իսկ Թիֆլիսում Հայաստանի ներկայացուցիչ Տ. Բեզադյանի հետ զրույցի ժամանակ նա խորհուրդ է տալիս անձնական հայեցողությամբ գործել, ընդգծելով, որ «Ծվրոպան կամ չի ցանկանում, կամ էլ չի կարող օժանդակել և հայերը պետք

²³ ИМЛ ЦПА ф. 558, оп. I, д. 1986, л. 1—2.

²⁴ «Бюллетень» МИД РСФСР, 23. 02. 1921, с. 31.

²⁵ АМИД СССР, ф. 32, д. 7, л. 104.

²⁶ ՀՀ ԿԳԱ, ֆ. 200, գ. 532, թ. 4:

է իրենք իրենց ապավինեն»²⁷։ Վրաստանում ԱՄՆ-ի ներկայացուցիչն իր հերթին հայտարարում էր. «Միացյալ Նահանգները մասնակցություն չունեցան Սերի պայմանագրին և թեկուզ մեր կառավարությունը ճանաչել է Հայկական Հանրապետությունը, սակայն երբեք իր վրա որևէ պարտավորություն չի վերցրել՝ հայ ժողովրդին պաշտպանելու կամ ռազմական աջակցություն ցույց տալու իմաստով։ Դրա համար էլ նա չի կարող ներկա տալ նախապես իր վրա պատասխանատվություն վերցնել»։ Հայաստանի «դաշնակիցները», նրան հանձնելով թուրքերի հոշոտմանը, հույս ունենին, որ պատերազմում հայերի պարտությունը կհաջորդի թուրքական ագրեսիայի ընդլայնումն Անդրկովկասում, ինչը կհանդեպնար թուրքիայի և Խորհրդային Ռուսաստանի միջև պատերազմին։

Եվրոպայի պարբերական մամուլը զայրույթով էր անդրադառնում Հայաստանի նկատմամբ Անտանտի քաղաքականությանը։ Այսպես, անգլիական ազատականների օրգան «Մանչեստր դարդիանը» 1920 թ. հունիսի 15-ին քննադատում էր Ֆրանսիայի և Անգլիայի՝ հայերի նկատմամբ վարած քաղաքականությունը, իսկ «Նեշնըլը» թերթը 1920 թ. նոյեմբերի 27-ին ուղղակի գրում էր. «Դաշնակիցները սահմանափակվեցին այն բանով, որ ապահովեցին իրենց շահերը։ Նրանք զավթեցին Սիրիան ու Միջագետքը և Հայաստանը թողեցին բախտի քմահաճությանը»։

Հայաստանի Հանրապետության կառավարությունը, ի վիճակի չլինելով շարունակել պատերազմական գործողությունները, ստիպված ընդունեց թուրքական հրամանատարության 1920 թ. նոյեմբերի 18-ին ներկայացրած զինադադարի պայմանները։ Բանակցություններն ընթացան թուրքական զորքերի կողմից գրավված Ալեքսանդրապոլում։ Թուրքական պատվիրակության ղեկավարը Քյազիմ Կարաբեքիր փաշան էր, իսկ հայկականինը՝ Ա. Խատիսյանը։ Թուրքիայի արտաքին գործերի նախարարի տեղակալ Ահմեթ Մուխթարը հետևյալ պատվերանը տվեց Քյազիմ Կարաբեքիրին. «Հայաստանը ընդունում է խիստ լայնատարած մոնոպոլիանական մի հողատարածքի վրա, հետևաբար անհրաժեշտ է նրան ինչպես քաղաքականապես, այնպես էլ փաստականորեն ոչնչացնել։ Հարկ է հաշվի առնել, որ քաղաքական ընդհանուր իրադրությունն ու մեր հզորությունը բարենպաստ են այդ մոնոպոլիությունն իրականացնելու համար։ Այս պատճառով էլ մենք հաշտության սովորական պայմանագիր չպետք է կնքենք ու մեր զորքերը դուրս բերենք Հայաստանից։ Հայերին խիղճամահ անելով, միաժամանակ, մենք պետք է ջանանք չսրել հարսբերությունները Եվրոպայի հետ, որի դաշնակիցն է Հայաստանը և այդպիսով պետք է համոզենք մեր նյութականներին։ Այժմ մենք պետք է նկրտենք վերջնականապես ոչնչացնել հայկական բանակը, զենքերը հայերից առգրավել և բաժանել մոնոպոլիաններին, հայերին զրկել նոր բանակ ստեղծելու իրավունքից, տիրել երկաթուղիներին և անմիջական կապ հաստատել ադրբեջանական թուրքերի ու նրանց կառավարության հետ։ Ահա այն հիմնական կետերը, որոնք պետք է գրվեն հաշտության պայմանագրի հիմքում»²⁸։

Բանակցություններում Ա. Խատիսյանի կողմից ներկայացված նախագծի համաձայն Հայաստանը պետք է ընդգրկեր ամբողջ Արևելյան Հայաստանը, Վանի նահանգը, Մանազկերտի շրջանը և ժովափնյա մի շերտ մինչև Ռիզե՝ 100 հազար քառակուսի վերստ տարածքով և երեք միլիոն բնակչությամբ։ Իսկ թուրք հայակերները «նախագծին» նպատակը Հայաստանին վերջ տալն էր։

Կարաբեքիր փաշան, ի պատասխան Հայաստանի Հանրապետության կառավարության նախագծի, ներկայացրեց խաղաղության պայմանագրի թուրքական նախագիծը, որի համաձայն թուրքիային պետք է անցնեին համարյա ամբողջ Հայաստանը՝ բացի Երևանի և Սևանա լճի շրջաններից։ Նախիջևանի, Շարուրի և Շախխաթի շրջանները հայտարարվում էին «ժամանակավորա-

27 22 ԿՊԱ, ֆ. 200, գ. 532, թ. 4։

28 22 ԿՊԱ, ֆ. 40/113, գ. 31, թ. 6։

պես» Թուրքիայի պաշտպանության ներքո անցած: Փաստորեն Թուրքիայի «հովանավորությունը» (պրոտեկտորատը) հաստատվում էր նաև ձևականորեն Հայաստանի խողոված 10 հազար զմ- հողատարածքի վրա: Այս սահմաններում ու Ահմեթ Մուխթարի պատվիրանը դրվեցին 1920 թ. դեկտեմբերի 2-ին արդեն հրաժարված դաշնակցական կառավարության կողմից ստորագրված Ալեքսանդրապոլի ամրագրի «խաղաղության» պայմանագրի հիմքում: Եվ զարմանալի չէ, որ խայտառակ այդ պայմանագիրը չճանաչվեց խորհրդայնացած Հայաստանի կառավարության կողմից:

Սեջրեբենք պայմանագրի առանձին հոդվածներ: Այսպես, Ալեքսանդրապոլի պայմանագրի 4-րդ հոդվածի համաձայն Հայաստանը պարտավորվում էր վերացնել պարտադիր զինվորական ծառայությունը երկրում, իսկ նրա կանոնավոր զորամասերի ընդհանուր թիվը չպետք է գերազանցեր 1500 զինվորից ու արտոնով և չափազանց փոքր զորավաճակ, վերջինս պայմանների կատարման վերահսկողությունը դրվում էր Թուրքիայի հատուկ քաղաքական ներկայացուցչի կամ նրանում թուրքական հյուպատոսի վրա: Պայմանագրի 12-րդ հոդվածը Հայաստանի բոլոր երկաթուղիները և հաղորդակցության այլ ճանապարհները դնում էր թուրքական իշխանությունների վերահսկողության տակ: 13-րդ հոդվածով Թուրքիան իրավունք էր ստանում իր զորքերը մտցնել Հայաստան և այնտեղ ռազմական բնույթի միջոցառումներ ձեռնարկել: Այսպիսով, Հայաստանի ինքնուրույնությունից մնում էր միայն նրա սովերեն և այն վերածվում էր սովորական մի թուրքական նահանգի:

Ինչպիսիք Անդրկովկաս թուրքերի նվաճողական ղինարշավը թուրք հեղինակները ներկայացնում են որպես «ազգային-ազատագրական պատերազմի» բաղկացուցիչ մաս: Ավելին, 1920 թ. հաղթանակները նրանք ներկայացնում են որպես «անկախության համար պատերազմում տարած առաջին հաղթանակը»²⁹, իսկ Զ. Քուլթայը հենց այդ հաղթանակի հետ է առնչում «ազգային-ազատագրական պայքարի» հետագա ճակատագիրը. «Եթե Կարաբեքիրը արեւելքում այդ հաղթանակը տարած չլիներ, ապա ինչպիսին կլիներ պայքարի ճակատագիրը»³⁰, գրում է նա: Նույն գնահատականն է տալիս նաև Ա. Ֆ. Զեբեսույը, որն իր հուշերի գրքում առաջինն է հրատարակել արևմուտյան ռազմաճակատի հրամանատար, Քեմալի մերձավոր զինակից Իսմեթ խեյի նամակը Քյադիմ Կարաբեքիրին. «Իմ թանկագին, իմ ամենասիրելի հղբայր Քյադիմ... Արևելյան արշավանքը մեզ և մեր գործը կյանքի կոչեց»³¹:

Հայաստանում խորհրդային իշխանության հաստատումից հետո ևս քեմալականները ջանացին շարունակել Անդրկովկասում իրենց նվաճողական քաղաքականությունը, միաժամանակ շթաքցնելով իրենց հակախորհրդային էությունը:

Հաշվի չնստելով Հայաստանի խորհրդայնացմամբ առաջացած նոր իրադրության հետ, Անկարայի կառավարությունը նկրտեց կյանքի կոչել Ալեքսանդրապոլի խայտառակությունը: 1920 թ. դեկտեմբերի 10-ին Թուրքիայի կառավարությանն ուղարկված հուշագրում Հայաստանի բոլշևիկյան կառավարությունը ասում էր. «Խորհրդային կառավարությունը հաստատ համոզմունք ունի, որ այսուհետև բացառվում է Թուրքիայի և Հայաստանի ժողովուրդների միջև թշնամական բախումների ամեն մի հնարավորություն, որ նրանց միջև նոր հարաբերությունները պիտի հաստատվեն արդարացի իրավունքների փոխադարձ ճանաչման և յուրաքանչյուր ժողովրդի ազատ և անարգել զարգացման հնարավորության ապահովման հիմքի վրա»: Հուշագրում այնուհետև ասված էր. «Խորհրդային Հայաստանի կառավարությունը Թուր-

²⁹ Enver Ziya Karal, Türkiye Cumhuriyeti tarihi (1918-193), İstanbul, 1953, s. 29.

³⁰ Cemal Kutay Karabekir Ermenistanı nasıl yıldı ? İstanbul, 1953, s. 2.

³¹ Ali Fuat Cebesoy, Moskova hatıraları, s. 90-91.

քիալից ակնկալում է նաև Ալեքսանդրապոլի պայմանագրի շեղյալ հայտարարումը և նոր պայմանագրի կնքման համար մի նոր համաժողովի մասնակցության պատրաստակամությունը: «Խորհրդային կառավարությունը դա առավել ևս անհրաժեշտ է համարում,—ասված էր այնուհետև հուշագրում,— քանի որ իր տրամադրության ներքո առկա են բազմաթիվ տվյալներ՝ վկայություններ այն մասին, որ հակառակ նոր հանգամանքներին, թուրքական հրամանատարությունը Հայաստանի գրավյալ հատվածներում ձեռնարկում է քայլեր, որոնք չեն կարող բացատրվել այլ կերպ, քան որպես շարունակություն Հայաստանի նկատմամբ անհաշտ թշնամանքի հին քաղաքականություն... Խորհրդային կառավարությունը հույս ունի, որ Ազգային Մեծ ժողովը կառավարության կողմից ձեռք կառնվեն բոլոր միջոցները՝ դադարեցնելու վերահիշյալ պորթոգլությունները և Հայաստանի ազատագրյալ ժողովի հետ հաստատելու բարեկամական փոխհարաբերություններ»³²։ Սակայն Անկարայի կառավարությունը ոչ միայն մերժեց վերանայել Ալեքսանդրապոլի պայմանագիրը, այլև, ինչպես երևում է 1920 թ. դեկտեմբերի 15-ի նրա հուշագրից, փորձեց «հիմնավորել» իր օրինական իրավունքները բռնախլված հայկական տարածքների նկատմամբ: Հուշագիրը շեղում էր. «Մենք անհրաժեշտ ենք համարում նշել, որ թուրք-հայկական խաղաղությունը ոչ թե բռնի խաղաղություն է, այլ ժողովուրդների ինքնորոշման իրավունքի վրա հիմնված խաղաղություն և մենք մեզ ենք կցել լոկ թուրքական ազգաբնակչությանը տարածքները...»³³։ Իր մի այլ՝ 1921 թ. փետրվարի 6-ի հուշագրում ևս Անկարան շարունակում էր կառնել Ալեքսանդրապոլի պայմանագրից. «Մենք գտնում ենք,—ասված է այնտեղ,—որ Ալեքսանդրապոլի պայմանագիրը մարմնավորումն է ոչ թե բռնության, այլ՝ արդարության և ոչ նրա կիրառումն անհրաժեշտ է կոմկասում ամուր խաղաղություն հաստատելու համար»: Հուշագրի վերջում Հայաստանից պահանջվում էր բարեխղճորեն հարգել պայմանագիրը, որը «կազմված է այնպես, որ բավարարի արդարության և հավասարության սկզբունքները»³⁴։

Դժվար չէ նկատել, որ քեմալականները վճռել էին չհրաժարվել հայ ժողովուրդի ու Հայաստանի նկատմամբ թուրքական «դասական» ու հարատև քաղաքականությունից:

Անկարայի կառավարությունը ոչ միայն չէր պատրաստվում իր զորքերը Ալեքսանդրապոլի շրջանից դուրս բերելու, այլև 1921 թ. սկզբին փորձեց իր նվաճումներն ընդարձակել նաև Վրաստանի հաշվին:

Արդահան ուղարկված թուրքական զորքերը հրաման ստացան գրավել Ախալցխան և Ախալքալաքը: Միաժամանակ Բաթումին տիրելու համար սկսեց կազմավորվել Ճորոխի զորախումբը:

Կարմիր բանակի և աշխարհազորայինների ներկայությանը բախվելով, թուրքական զորքերը հարկադրվեցին Ախալցխայից և Ախալքալաքից ձեռքաշել: Սակայն 1921 թ. մարտի 11-ին Բաթում մտնելով, նրանք այնտեղ Քյազիմ բեյի գլխավորությամբ թուրքական վարչություն ստեղծեցին³⁵:

Սակայն Բաթումի 4000-անոց մենշևիկյան զորքն անցավ քաղաքի հեղկոմի կողմը և մարտի մեջ մտավ թուրք զավթիչների դեմ: Մինչև 11-րդ կարմիր բանակի զորամասերի ժամանումը, թուրքերն արդեն ջախջախված էին: Մարտի 11-ին Բաթումը, Ախալքալաքն ու Ախալցխան գրավվեցին կարմիր բանակի կողմից:

Կոմկասում կարմիր բանակի հաջող առաջխաղացումն ու Վրանգելի պարտությունը խորտակեցին քեմալականների համաթուրքական ցնորքները և

³² ДВП СССР, т. 2. М., 1985, с. 397.

³³ Նույն տեղում:

³⁴ Նույն տեղում, էջ 487—488.

³⁵ Центральный государственный архив Республики Грузия, ф. 13, д. 124, л. 7.

ներանք որոշեցին վերսկսել 1920 թ. օգոստոսին ընդհատված մոսկովյան բանակցությունները:

Դեռ նախքան Մոսկվայի խորհրդաժողովի վերսկսելը, 1921 թ. փետրվարի 12-ին, Ստալինը նախազգուշացրել էր Լենինին այն մասին, որ Կ. Միչերինին թույլ չտրվի Հայկական հարցն արծարծել այսպես, ինչպես նա արել էր առաջին խորհրդա-թուրքական ձախողաքով ավարտված խորհրդաժողովում. «Ընկեր Լենին, — դրում էր նա, — ես միայն երեսը իմացա, որ Միչերինն, ինչ-որ մի ժամանակ թուրքերին տրամար (պրոպոկացիոս) պահապ է ուղարկել Հայաստանի օգտին Վանը, Մուշը և Բիթլիսը՝ թուրքերի խոշոր գերակշռություն ունեցող թուրքական այգ նահանգները, Հայաստանի օգտին դատարկելու վերաբերյալ: Իմ պերիալիստական այս պահապը չի կարող մեր պահանջը լինել: Անհրաժեշտ է Ձիչերինին արգելել ազգայնականորեն տրամադրված հայերի թելադրանքով հուշագրեր ուղարկելու թուրքերին»³⁶, Ինչ խոսք, Ստալինի դիրքորոշումը ձեռնտու էր թուրքական պատվիրակությանը: Ա. Ֆ. Զեբեսույը գրել է. «Ինձ հաղորդեցին, որ մոսկովյան խորհրդաժողովին գործուն մասնակցություն է բերելու ընկեր Ստալինը»: Այնուհետև խոսելով Ստալինի հետ իր հանդիպման մասին՝ նա ավելացրել է. «Ոչ մի բառ չփոխանակվեց Թուրքիայի կողմից իր հողատարածքի մի մասը Հայաստանին հանձնելու մասին»³⁷:

Ստալինի հակահայկական դիրքորոշումն աներկիմաստ արտահայտված էր հենց իր իսկ կողմից գլխավորվող Ազգությունների ժողովրդական կոմիսարիատի պաշտոնաթերթ «Ժիզն նացիոնալնոստեյ» պարբերականում, որի 1921 թ. մարտի 4-ի համարում լույս էր տեսել «Հայաստանը և Թուրքիան առաջին խորհրդաժողովում» խորագրով առաջնորդողը: Հոդվածի ներքո Ա. Սկաչկոյի ստորագրությունն էր, այն նույն Սկաչկոյի, որին Օրջոնիկիձեն անվանել էր «Թուրքական իմպերիալիզմի դատապաշտպան»³⁸: Սահմանափակվեց մի քանի մեջբերումներով, որոնք թույլ կտան առավել խոր ընկալել այդ հոդվածի էությունը. «Անհրաժեշտ է, որ խորհրդաժողովի մասնակից պետությունները միմյանց կատարեն այնպիսի զիջումներ, որոնք թույլ տան վերացնելու փոխադարձ ռեզոնություն և անվստահություն արմատները... Միջոցառ պետական-ազգային շահեր հետապնդող Անկարայի կառավարության համար արտակարգ կարևոր է թուրքական հողատարածքի պահպանումը, գուցե և ծավալումը սոցիալիստական պետությունների համար ոչ հողատարածքը, ոչ էլ ազգային միասնությունը ոչ մի դեր չեն խաղում... Այս բոլոր նկատառումները հիմնականում վերաբերում են Հայաստանին, քանի որ ոչ Ռուսաստանը, ոչ էլ Ադրբեջանը Թուրքիայի հետ վիճելի ոչ մի հարց չունեն: Խորհրդաժողովի գլխավոր հաջցը հայկականն է, ուրիշ խոսքով, Թուրքիայի և Հայաստանի միջև բոլոր թյուրիմացությունների հարթումը և բարեկամական հարաբերությունների հաստատումը... Հայաստանը, անկասկած, պիտի հարկադրվի ղեկավարվել ազգային մեծագույն զոհաբերությունների վերաբերյալ Լենինյան սկզբունքով: Նա պիտի հարկադրվի հրաժարվել ոչ միայն Մեծ Հայաստանի վերաբերյալ դաշնակցականների իմպերիալիստական ծրագրերից, այլև, հնարավոր է, նույնիսկ մշապես հայկական անվանված հողատարածքների միավորման ավելի համեստ ցանկությունից... Եվ եթե նույնիսկ Բիթլիսից ու Վանից գաղթականները մերօրյա Հայաստանում անկարագրելի զրկանքներ են կրում, եթե նույնիսկ Թուրքիայում մնացած հայերն այժմ շարունակում են հետապնդվել ու ճնշումների ենթարկվել կառավարության կողմից, Հայաստանին համենայնդեպս մինչև մի որոշ ժամանակ ուրիշ բան չի մնում անել, քան հաշտվել դրա հետ, համաշխարհային հեղափոխության շահերին զոհաբերել և իր ժողովրդի այնտեղ մնացած հատ-

³⁶ ЦПА ИМЛ, ф. 598, оп. I, д. 5214, л. 2.

³⁷ Ali Fuat Cebesoy, No-kova hatıraları, s. 116.

³⁸ ЦПА ИМЛ, ф. 558, оп. I, д. 2202, л. 2.

վածները: Հայաստանը պիտի հարկադրվի հրաժարվել այն հողատարածքներից, որոնք արդեն իսկ մտել էին անկախ Հայաստանի կազմի մեջ: Կարսի և Արդահանի նահանգներին այսուհետև պետք չէ կռվախոսքով լինել Հայաստանի և Թուրքիայի միջև, քանի որ հարկ է ուշադրության առնել այն, որ հայկական կառավարության կողմից այդ նահանգների զավթումը զուտ իմպերիալիստական արարք էր»:

Կարիք կա, արդյոք, զարմանալու, որ մոսկովյան խորհրդա-թուրքական բանակցությունները անցան իր անբարոյականությանը եզակի այս հոդվածում պարփակված «հրահանգներին» ոգով:

Տնտեսության նախարար Յուսուֆ Քեմալ բեյի գլխավորած թուրքական պատվիրակությունը Մոսկվա գնալուց առաջ այցելեց Բաքու, որտեղ հանդիպումներ ունեցավ Ադրբեջանի ղեկավարների հետ: Դրանցում քննարկված գլխավոր խնդիրն այն էր, թե թուրք-խորհրդային առաջիկա խորհրդաժողովում ինչպես կենսագործել Հայաստանի նկատմամբ Թուրքիայի և Ադրբեջանի զավթողական ծրագրերը: Այդ մասին աներկբայորեն վկայում է փետրվարի 19-ին Ս. Նարիմանովի՝ Լենինին ուղարկած նամակը. «Թուրքների համար ամենափափուկ հարցը հայկականն է: Այդ հարցում նրանք առավելագույն ռանդ են հանդես բերում, որպեսզի այն իրենց օգտին լուծվի: Հայկական հարցը կայանքի ու մահվան խնդիր է: Եթե այս հարցում զիջելու լինենք, ապա զանգվածը չի գնա մեր հետևից: Ի դեպ, այս հարցի մեր օգտին լուծումը մեզ ուժեղ կդարձնի: ...Եթե հայկական հարցի պատճառով Մոսկվան անկարացիներին իրենից վանի, ապա նրանք, հուսալքված, կարող են Անգլիայի փրկել նետվել: Այդ ժամանակ ի՞նչ կարող է պատահել... Սա պետք է Ձեզ նախազգուշացնեմ. ընկեր Չիչերինը շփոթում է Արևելյան հարցը: Նա մի քիչ շատ է հրապուրվում Հայկական հարցով և հաշվի չի առնում այն ամենը, ինչ կարող է պատահել, եթե անկարացիների հետ խզումը տեղի ունենա հենց Հայկական հարցի հետևանքով... Եթե ցանկանում ենք Ադրբեջանը մեր ձեռքին պահել, ապա պետք է, ինչ գնով ուզում է լինի, անկարացիների հետ ամուր դաշինք կնքենք: Սա ընդգծում եմ. այդ դաշինքը մեզ կբերի մոսկովյանական ամբողջ Արևելքը»³⁹: Ի դեպ, մոսկովյան խորհրդաժողովի բացման նախօրեին Ն. Նարիմանովը հարկ է համարել մի անգամ ևս Լենինին նախազգուշացնել այն մասին, որ «Հայկական հարցը թուրքական պատվիրակության հետ բանակցություններում չպետք է դեր խաղա»⁴⁰:

Բաքվում գործողության որոշակի ծրագիր մշակելուց հետո թուրքական պատվիրակությունն անցավ Մոսկվա, որտեղ խորհրդա-թուրքական բանակցություններն սկսեցին փետրվարի 26-ին: Օգտվելով այն իրողությունից, որ փետրվարյան հեղաշրջման հետևանքով Երևանում խորհրդային իշխանությունը տապալվել էր, թուրքերը կտրականապես հրաժարվեցին բանակցություններ վարել խորհրդային Հայաստանի պատվիրակության հետ: Նրանք նորից հանդես եկան հողատարածքային հարցերում Բրեստ-Լիտովսկի և Ալեքսանդրապոլի պայմանագրերը հիմք համարելու պահանջով: Իր հերթին, խորհրդային Ռուսաստանի պատվիրակության ղեկավար Գ. Չիչերինը վերստին պահանջեց արդար լուծել Հայկական հարցը, հատկապես՝ վերադարձնել Արևմտյան Հայաստանի թեկուզ մի փոքր մասը, ինչպես նաև քեմալականների կողմից զավթված Կարսն ու Արդահանը: Այդ պահանջը, սակայն, Ստալինի կողմից պաշտպանության չարժանացավ:

Պատահական չէ, որ բանակցություններին մասնակցած թուրք դիվանդանները, նաև թուրքական պատմագիտությունն ընդհանրապես, միաձայն հովաքանում են Ստալինին և վատաբանում Գ. Չիչերինին: Այլ Ֆուադ Ջեբեսուլը, օրինակ, գրել է. «Լենինից հետո երկրորդ դեմքը եղող և Լենինի համաձայնությամբ երկրում ամբողջ իշխանությունն իր ձեռքում կենտրոնացրած

³⁹ Նույն տեղում, փ. 2, օր. I, ը 24503, յ 1—2.

⁴⁰ Նույն տեղում, գ. 24504, թ. 1:

Ստալինի կողմից մոսկովյան խորհրդաժողովին մասնակցելու վերաբերյալ մեզ ուղարկված պաշտոնական հրավերը ոչ այլ ինչ էր, եթե ոչ նկրտում՝ փոխելու խորհրդային կոմիսար Ջիլերինի հաշտություն շունեցած քաղաքականությունը, որը նա վարեց Թուրքիայի նկատմամբ: ...Ջիլերինի և Կարախանի հետ հանդիպումից մենք հասկացանք, որ այդ ճառագարհով մենք որոշակի արդյունքների չենք հանդի: Եվ որպեսզի իզուր ժամանակ չկորցնենք, մենք ազդությունների գործերի կոմիսար ըսկեր Իոսիֆ Զուլաշվիլի Ստալինից խնդրեցինք մեզ ընդունել: Այնուհետև, վերհիշելով Ստալինի հետ իր զրույցը, Թուրքիայի նախկին դեսպանը մեջքերել է նրա հետևյալ խոսքերը. «Հայաստանի հարցը դուք ինքներդ լուծել եք, եթե դեռ չլուծված ինչ-որ բան մնացել է, ապա դա ևս դուք ինքներդ լուծեք, սակայն մեղ տեղյակ պահեք վերջնական ժամկետներին»⁴¹:

Այս ամենը վկայում է, որ մոսկովյան խորհրդաժողովում Թուրքական պատվիրակության հաշտությունը կանխորոշված էր: Իզուր չէ, որ Թուրքերը ոչ մի հարցում զիջումների չդիմեցին և հողատարածքային կարևոր ձեռքբերումների հասան: Ահա թե Թուրքիայի բանագնացները (Քյազիմ Կարաբիքիրին ուղարկված հեռագրում) ինչպես են բնութագրել Ստալինի դերը. «Ստալինն անձնապես հայերի ոխերիմ թշնամին է... պայմանագրի կնքումն իրականացավ Ատալինի շնորհիվ»⁴²:

1921 թ. մարտի 16-ին կնքված «բարեկամության և եղբայրության» թալանչիական հակահայկական պայմանագրի հիմամբ, Թուրքիային անցան Կարսի մարզը (որի կազմի մեջ էին մտնում Կաղզվանի, Արգահանի, Օլթիի, Կարսի օկրուգները) և Սուրմալուի գավառը: Ինչ վերաբերում է Արևմտյան Հայաստանին, ապա նրա հարցը նույնիսկ չարժարծվեց: Ի դեպ, Թուրք պատմաբանները չեն էլ թաքցրել իրենց խորը գոհունակությունը: Բյուզոզլուն գրել է. «մարտի 16-ի պայմանագրով Արգահանը, Կարսը և Արդվինը առանց հանրաքվեի անցան Թուրքիային, Բաթումի փոխարեն մենք ստացանք Սուրմալուի գավառը և Ադրբեջանի հողատարության ներքո ստեղծվեց նախիջևանի ինքնավար հանրապետությունը (5,5 հազար քառ. կիլոմետր տարածքով) այն պայմանով, որ Ադրբեջանն այդ հողատարածությունը չզիջի մի երրորդ պետության»⁴³ (այսինքն՝ բուն իրավաբանը Հայաստանին—Ն. Ս.): Ավելին, Մոսկովյան պայմանագրի հիմամբ «Ռուսաստանը պարտավորվում է անդրկովկասյան հանրապետությունների նկատմամբ նախաձեռնել անհրաժեշտ քայլեր, որպեսզի նրանք Թուրքիայի հետ կնքվելիք պայմանագրերում պարտադիր ճանաչեն սույն պայմանագրի այն հոդվածները, որոնք անմիջականորեն իրենց են վերաբերում»⁴⁴:

Ինչպես արդեն ասվեց, Թուրքերի պահանջով խորհրդաժողովն իր դռները փակեց հայկական պատվիրակության առաջ, թեկուզ այնտեղ վճռվում էին բացառապես Հայաստանին վերաբերվող հողատարածքային հարցեր: Դա, խորհրդային Ռուսաստանի հետ պայմանագրային որևէ պարտավորությամբ չկապված, մեր հանրապետության գերիշխան իրավունքների աղաղակող ոտնահարում էր: Խորհրդային Ռուսաստանն իրավական որևէ հիմք չունեի տնօրինելու նրա հողատարածքը, կամայականորեն ճշտորոշելու նրա պետական սահմանները:

Խորհրդաժողովի որոշումների մասին հայկական պատվիրակությունն իմացավ հետին թվով, որպես կատարված իրողություն: Նրա ղեկավար Ա. Բեկլադյանը Գ. Ջիլերինին ուղղված իր հայտարարության մեջ Խորհրդային Ռուսաստանի պատվիրակությանը մեղադրեց Կարսը, Արգահանը և Սուրմալուն ապօրինաբար Թուրքիային հանձնելու մեջ:

⁴¹ Ali Fuat Cebesoy, Moskova hatıraları, s. 146.

⁴² R. M. Heri, Aia ū-k ve komun z.n, Istanbul, 1971, s. 93b.

⁴³ Tevlik Biyiklingiu, Atatürk Anadoluja, 1917—1921, Ankara 1959, s. 21.

⁴⁴ Տե՛ս Հայաստանի Հանրապետություն, 16. 3. 1991:

իր պատասխանում Գ. Չիչերինը հարկադրվեց բացել բանակցությունների անդրկուլիսյան երեսը, խորհրդային պետության ու բոլշևիկյան կուսակցության անձեռնհաս երևելիների անվայել միջամտությունը, որը և կանխորոշել էր խորհրդաժողովի ընթացքն ու արդյունքը: Գ. Չիչերինը գրել է. «Ընկեր Բեկդադյանը գործն այնպես է ներկայացնում, որ կարծես բանակցություններն սկսվել են մեր քաղաքական հանձնաժողովի առաջին նիստից: Տարօրինակ կերպով նա կատարելապես շրջանցում է այն, որ քաղաքական հանձնաժողովի նիստերն սկսեցին մեր ու Թուրքիայի միջև իսկական բանակցությունների սկսելու երկու շաբաթ անց: Բանակցությունների առավել բուռն ժամանակաշրջանն ընթացավ բոլորովին էլ ոչ հանձնաժողովի նստաշրջանում, այլ մասամբ անդրկուլիսյան բանակցություններում և մեր ազդեցիկ ընկերների ներգործության ներքո: Քաղաքական հանձնաժողովի նստաշրջանը բացվեց միայն այն ժամանակ, երբ հիմնական հարցերն արդեն վճռված էին: ...Պայմանագրային սահմանն այդ պատճառով բոլորովին էլ չի հանդիսանում ոչնչով շարժաբացված մի նվեր Թուրքիային: Այն պարզապես արդյունք է ամենաբուռն երկարատև մի պայքարի: Բեկդադյանին չի կարող հայտնի լինել, որ բանակցությունների յուրաքանչյուր փայլն ուղեկցվեց կենտկոմի որոշումներով: Պայմանագրային սահմանագիծը ճիշտ որոշվեց բուռն վիճաբանություններից հետո, ըստ որում քայլ առ քայլ տեղի ունեցան փոխզիջումներ, իսկ մեր կողմից զիջումներն արվեցին կենտրոնական կոմիտեի որոշումներով: Չեղավ ոչ իսկ մեկ հատիկ կարևոր հարց, որի վերաբերմամբ կենտրոնական կոմիտեն որոշում ընդունած չլիներ: Հենց այս ամենն էլ հայտնի էր Հայկական պատվիրակությանը»⁴⁵:

Այսպիսին եղավ մոսկովյան առաջին փայլը քաղաքական այն անվայել խաղում, որը խորհրդային կառավարությունը վարեց Հայկական բազմաշաբաթ հարցի շուրջ: Ապշեցուցիչն այն է, որ հայ ժողովուրդը, հանձին իր դիվանդիտական պաշտոնական պատվիրակության, այդ խաղից դուրս թողնվեց: Մոսկովյան անօրինական և անբարո մեքենայությունների հետևանքով արևաթաթախ և մահամերձ Հայաստանը զրկվեց ևս մոտ 24 հազար կմ² բնիկ տարածքից:

Նորահայտ փաստաթղթերի ուսումնասիրությունը մեզ հանգեցրեց այն եզրահանգմանը, որ խորհրդային Ռուսաստանի պատվիրակության ղեկավար Գ. Չիչերինի և քաղբյուրուլի ու կենտրոնական կոմիտեի միջև քեմալական Թուրքիայի նկատմամբ գոյություն ունեին տարբեր տեսակետներ: Այդ փաստաթղթերը բացահայտում են բանակցությունների անդրկուլիսյան խաղերը և պատահական չէր, որ դրանք հենց սկզբից ընթացան հակահայկական ոգով՝ կանխորոշելով Թուրքական պատվիրակության հաջողությունը: Լենինը, Ստալինը, Տրոցկին հակառակ Չիչերինի աթքարացի, օբյեկտիվ տեսակետին, թելադրում էին նրան «հեղափոխության դրոշակակիր քեմալական Թուրքիայի պահանջները ինչ գնով էլ լինի բավարարել»:

Այդ բոլորի արգասիքը եղավ այն, որ մարտի 16-ին կնքվեց «Բարեկամության և եղբայրության» խայտառակ, ապօրինի պայմանագիրը, որով առանց Հայաստանի Հանրապետության իմացության նրա տարածքից 24 հազ. քառ. կմ տրվեց Թուրքիային: Այդ խայտառակ, ապօրինի գործարքը տեղի ունեցավ Ռուսաստանի և Թուրքիայի միջև ի հաշիվ Հայկական Հանրապետության:

⁴⁵ АВП СССР, папка 7, оп. 4, д. 47, л. 16, 17.

НАШЕСТВИЕ КЕМАЛИСТОВ НА ЗАКАВКАЗЬЕ В 1920—1921 ГГ. И МОСКОВСКИЙ ДОГОВОР 16 МАРТА 1921 Г.

Е. К. САРКИСЯН

Резюме

Советская Россия рассматривала кемалистскую Турцию как знаменосца социалистической революции на Востоке. Армянские коммунисты своей агитацией разлагали армию и призывали армянских солдат покинуть фронт, способствуя этим продвижению кемалистских войск, якобы несущих армянам «не резню, а революцию и свободу». Архивные первоисточники свидетельствуют о том, что еще до истечения турецких войск на Армению между анкарским правительством и правительством Советской России действительно существовала договоренность о нападении турецких войск на Армению. Члены Политбюро и ЦК накануне и в дни московских советско-турецких переговоров в феврале-марте 1921 г. проводили антиармянскую политику.

Турецкие историки пытаются представить кемалистскую агрессию в Закавказье в 1920 г. как составную часть национальной войны, «а территории, отошедшие к Турции по московскому договору, «как исконно турецкие земли».